

կութիւններ են վերագրում, մինչև իսկ սուրբերի զօրութիւն։ Դաւիթը իւր ձեռքն անիծում է թուլանում է։ Մհերին անիծում է, և ասողն աւելացնում է. «Նորանց ցեղի բերանը կրակ էր, ինչ անիծէր, այնպէս կը լինէր» (№ 14, § 129, և էջ 36)։ Արդեօք այս գաղափարը նախնական էր, որ բղխում էր Զոջանց տան միջբական ծագումից, թէ յետոյ է աւելացել, երբ Մամիկոնեանք խնամութեամբ՝ Սահականոյշի և Համազասպ Մամիկոնեանի ամուսնութեամբ Լուսաւորչի տան ժառանգ դարձան։ Նման գաղափար կայ Լոռու Դսեղ գիւղում ապրող Թումանեանների մասին, ինչպէս մեզ պատմել է մեր բանաստեղծ Յ. Թումանեանը, որոնք Մամիկոնեան են համարւում։ Շեշտենք և այն, որ Զոջանց տան փոփոխակ առաջին անգամն է հրատարակւում Գաւաշու բարբառով, որ և լեզուական մի քանի ինքնուրոյնութիւններ ունի։

§ 5. Ինչ վերաբերում է № 15-ին՝ պէտք է ասենք, որ չնայելով Մովսէս Բարբառով եղած հինգ փոփոխակների հրատարակութեան (№ 2, 4, 7, 8 և 11)՝ մենք հրատարակեցինք և այս իրրե մի բաւական ընդարձակ և հանգամանօրէն պատմութեամբ։ Չպէտք է անուշադիր թողնել և պատմող Թումասի այն գիտողութիւնը, որ ըստ բանահաւաք Ս. Հայկունու էր. «Իւր ասածը ստոյգ կը համարէ, իսկ ուրիշ ճիւղերը նոր յերիւրուած աւելորդարանութիւն» (№ 15, էջ 39, ծանօթ. 2)։ Ուշադրութեան արժանի է այս հանգամանքը. հմուտ վիպասացներ արդէն նկատել են, որ մեր վէպում նորութիւններ, ուրեմն դարերի շերտաւորումներ են աւելանում, շատ անգամ ի հարկէ տեղական։ Նոյնն է հաստատում Վարդան Մովսէսին, «Որ Հայր մերի պէս սիրտած էր, կասէր շատ վարժ..., որ չէր կարող իւր գիտցածին վերայ մի նախադասութիւն անգամ աւելացնել կամ պակասացնել. նա իրրե Աստուծմէ շնորհեալ մի աւանդ կը պատմէր, շատ անգամ լրջաբար կը զայրանար այն անձանց վերայ, որ իւր գիտցածէն աւելի կը պատմեն և այդ աւելին յերիւրուած, շինծու կը համարէր, հետեաբար ասելն ևս մեղք է, քանի որ ողորմիներ կան, ինչ որ աւանդուած է, այնպէս ասելու է, կասէր նա» (№ 8, էջ 50. հմմտ. № 14, էջ 2, ծանօթ. 1)։

Բացի այդ այստեղ կան հետաքրքրական նորութիւններ։ Այս կողմից նախ աչքի է ընկնում Քուռկիկ Ճալալ ձիու ծագումը, մասամբ և բացատրութիւնը (№ 15, էջ 63—64 ծանօթ.)։ Այս ձին յիշուած է և Քաջանց տան վէպում, որի գլխաւոր դիւցազն է Արշակ Բ. Անուշ և Շիրին շահ անուհով։ Եւ որովհետեւ այստեղ նկարագրած Քուռկի Ճալալու ծագումը շատ նման է Քէօռ-Օղլու Ղաթ ձիու ծագման, ուստի մեր ունեցած այլ ապացոյցների վրայ աւելանում է մի նորն ևս, որ Քէօռ-Օղլին մեր Արշակ Բ. է. իսկ այդ ձին յիշեցնում է մեզ Տիրան Բ.-ի, Արշակ Բ.-ի հօր, հոշակաւոր